



Pou Piblikasyon Imedya: 15/05/2023

GOUVÈNÈ KATHY HOCHUL

GOUVÈNÈ HOCHUL SIYEN YON LEJISLASYON POU RANFÒSE MENDÈV SWEN SANTE A

Lejislasyon (A3076-A/S447-C) pèmèt etidyan enfimye yo konplete jiska yon tyè nan fòmasyon klinik yo atravè eksperyans similasyon

Lejislasyon an pral akselere fòmasyon pou ede abòde pwoblèm mank enfimye a epi ap amelyore swen pou Nouyòkè yo

Jodi a, Gouvènè Kathy Hochul te siyen lwa (A3076-A/S447-C), ki ranfòse mendèv swen sante New York la lè li pèmèt etidyan enfimye yo konplete jiska yon tyè nan fòmasyon klinik yo atravè eksperyans similasyon. Fòmasyon similasyon an, ke Depatman Edikasyon Eta New York la sipèvize, bay elèv yo eksperyans pratik nan anviwònman klinik yo pandan l ap pèmèt pwogram edikasyon enfimye yo ofri plis opsyon pou edikasyon klinik. Kòm New York ap fè fas ak yon mank enfimye nan moman an, elaji eksperyans similasyon ka ede akselere fòmasyon ak pote plis enfimye kote yo pi bezwen yo.

"Enfimye nou yo te presye anpil pou sistèm swen sante nou an, espesyalman pandan tout pandemi an, men twò souvan yo santi yo travay twòp nan fè travay yo renmen an, sa ki te sèlman anplifye akòz mank enfimye nan moman an", **Gouvènè Hochul te deklare.** "Mwen fyè pou m siyen lejislasyon k ap ranfòse mendèv swen sante nou an nan akselere fòmasyon epi pèmèt enfimye ki gen plis kapasite antre nan mendèv la pou amelyore swen pou tout moun epi kreye yon New York ki pi an sekirite ak pi an sante".

Lejislasyon (A3076-A/S447-C) pèmèt jiska yon tyè fòmasyon klinik nan pwogram sètifika ak diplòm syans enfimye yo fèt atravè eksperyans similasyon. Sa pral rann edikasyon enfimye pi aksesib, sa k ap ede abòde pwoblèm mank enfimye New York, ki prevwa atenn nesosite yon mendèv ki nan apeprè 40,000 anplwaye jiska 2030. Fòmasyon ki nesese pou vin yon enfimye trè kalifye nan New York egzije plasman klinik nan yon lopital, epi jiskaske elèv yo fini plasman sa yo, yo pa ka resevwa lisans enfimye yo epi rantr sou mache travay la. Otorize plis fòmasyon simile pral pèmèt pwogram enfimye yo ogmante kapasite yo pou fòm etidyan ki anvi vin enfimye, abòde mank lan, epi asire bon jan kalite swen pou plizyè milyon Nouyòkè. Anplis New York, fòmasyon similasyon gwo teknoloji ak kalite siperyè deja an plas nan 31 eta.

Senatè Eta, Toby Ann Stavisky, te deklare, "N ap pale sou zafè mank de enfimye a pandan plizyè ane epi kounye a nou finalman ap fè yon bagay sou sa. Lè nou itilize teknoloji pou simile fòmasyon klinik, nou pral gradye yon nouvo jenerasyon enfimye ki resevwa fòmasyon nan New York avèk eksperyans pratik. Kounye a, pwogram enfimye yo ap refize kandida ki kalifye. Avèk lejislasyon sa a, New York pral rejwenn 31 lòt eta pou pèmèt eksperyans similasyon. Raman mwen te wè inanimite konsa sou yon pwojè lwa. Lwa sa a se rezilta yon kolaborasyon ant tout pati ki konsène yo: Gouvènè Kathy Hochul, Manm Asanble Donna Lupardo ak Pat Fahy, lidè lejislatif ak anplwaye yo, Rektè CICU, SUNY ak CUNY ak SED".

Manm Asanble Donna Lupardo te deklare, "Nan otorize pou jiska yon tyè nan fòmasyon klinik yo baze sou similasyon, sa pral ede abòde pwoblèm mank enfimye nan New York, pandan l ap ekspoze etidyan yo a yon eksperyans aprantisaj pratik ki gen anpil valè. Mwen te obsève fòmasyon sa yo nan Fakilte Syans Enfimye Decker (Decker College of Nursing) nan Inivèsite Binghamton, epi mwen te enpresyone nan jan similasyon dènye kri yo kapab parèt reyèl. Mwen ta renmen remèsye Gouvènè a paske li siyen lejislasyon sa a, Senatè Stavisky pou patenarya li, ak defans anpil moun ki gen ladan Rektè SUNY King, Rektè CUNY Matos-Rodriguez ak CICU".

Komisè pa Enterim Depatman Sante Eta a, Doktè James McDonald, te deklare, "Lejislasyon sa a pral ajoute enfimye ki pi kalifye epi ki pare pou pratike sou mache travay swen sante a. Mwen remèsye Gouvènè Hochul paske li montre yon lòt fwa ankò angajman li pou sante nan kominote nou yo ak pou amelyore kondisyon pou moun ki dedye a swen pasyan nan tout Eta New York, epi mwen remèsye Senatè Stavisky ak Manm Asanble Lupardo paske yo sipòte pwojè lwa a".

Rektè Konsèy Administrasyon an, Lester W. Young, Jr., te deklare, "Enfimye yo se pwofesyonèl swen sante devwe, vital ki sèvi kèk nan popilasyon ki pi vilnerab nou yo. Konsèy Administrasyon an pran angajman pou l fè tout sa li kapab pou ede soulaje mank enfimye ki antrave sistèm swen sante nou an avèk politik pou amelyore ak ranfòse edikasyon klinik pou prepare plis enfimye alavni pou sitiyasyon reyèl ki sove lavi".

Komisè Edikasyon Eta a, Betty A. Rosa, te deklare, "Premye priyorite nou se toujou pwoteksyon piblik. Nou te travay nan tèt kole ak pati konsène yo sou lejislasyon enpòtan sa a pou asire ke eksperyans similasyon bon jan kalite nan pwogram edikasyon enfimye yo defini byen klè pou prepare etidyan enfimye yo pou pratik san danje, efikas nan nivo debitan. Nou rekonesan anvè Gouvènè a ak Lejislati a pou kolaborasyon yo ak volonte yo pou asire ke similasyon klinik yo itilize yon fason apwopriye ak responsab, bay enfimye nou yo pi bon edikasyon posib epi priyoreze sekirite piblik".

Rektè SUNY an, John B. King, Jr., te deklare, "Mwen felisite Gouvènè Kathy Hochul paske li sipòte fòmasyon pwochen jenerasyon enfimye New York yo lè li siyen lwa enpòtan sa a. SUNY gen plis pase 70 pwogram enfimye atravè sistèm nou an, men anpil nan etidyan yo gen difikilte pou jwenn yon bon kalite plasman klinik toupre

inivèsite yo. San ase plasman klinik bon jan kalite, pwogram enfimye atravè New York pa kapab elaji pou satisfè demann k ap ogmante pou satisfè bezwen enfimye eta a. Mwen ta renmen remèsye patnè nou yo nan CICU, CUNY, ak Depatman Edikasyon Eta New York dèske yo travay ansanm pou rezoud mendèv ijan sa a ak defi swen sante".

Rektè CUNY an, Félix V. Matos Rodríguez te deklare, "New York kontinye bezwen plis enfimye ki kalifye, ki sètifye epi pwojè lwa similasyon enfimye a pral pèmèt etidyan enfimye yo antre sou mache travay la pi vit san yo pa sakrifye fòmasyon solid yo. Mwen rekonesan anvè Gouvènè Hochul ak lidè lejislatif yo pou mezi sansib sa a pou soulaje mank kritik enfimye nan eta a epi fè etidyan enfimye CUNY yo antre sou mache travay swen sante kote yo bezwen yo anpil".

Prezidan Komisyon Fakilte ak Inivèsite Endepandan (Commission on Independent Colleges and Universities) yo, Lola W. Brabham, te deklare, "Mèsi Gouvènè Hochul pou lidèchip ou ak paske w aji byen vit pou siyen lwa esansyèl sa a. Se yon etap enpòtan pou abòde pwoblèm mank enfimye New York la epi nou rekonesan anvè Lejislati a ak patnè fòmèdab nou yo nan SUNY, CUNY, ak Depatman Edikasyon Eta New York pou kolaborasyon sere yo sou lejislasyon sa a. Nou gen anpil chans pou nou gen yon gouvènè ki bay edikasyon siperyè valè, ki gen yon angajman inebnanlab pou investi nan avni mendèv New York la, epi ki konprann edikasyon siperyè, piblik kou prive, ap devlope pwochen jenerasyon antreprenè, edikatè, ak pwofesyonèl swen sante ke Eta nou an bezwen".

###

Lèt nouèl disponib sou sit www.governor.ny.gov
Eta New York | Chanm Egzekitif | press.office@exec.ny.gov | 518.474.8418